

Deal sera cu autoridadnan Mericano:

Randy Habibe a bay di acuerdo cu castigo di 11 aña di prison

ORANJESTAD(AAN) Decision a cay den e caso di Randy Habibe, kende a worde extradita pa Merca y ainda tabata den prison na Miami pendiente su caso penal den corte Mericano despues di mas cu dos aña.

E caso di Randy Habibe tabata uno hopi complica debi cu documentonan cu a worde confisca, na negoshinan di Randy na Aruba, no a bay segun cierto reglanan di ley y pesey mes Habibe a bringa e acto di confisca ey, como uno cu tabata ilegal y pa cual e documentonan, segun su defensa, no por a worde uza den su caso na Merca.

Fuera di e documentonan, abogadoan di señor Habibe kier a bringa tambe e caso di extradicion di Randy for di Aruba como un acto ilegal pasobra manera ta conoci caba cu e extradicion di e prome tres Arubianonan pa teritorio Mericano, tabata uno cu a ser pusha den pura na un forma masha straño mes y asina tabata tin hopi otro aspecto tecnico hudicial cu lo a haci tratamiento di e caso den corte na Merca uno dificil pa ambos partido.

Mirando cu Habibe tabata bayendo pa cumpli tres aña bao detencion den prison y e posibilidad grandi di lo por keda hopi mas aña sera y sigur coriendo e riesgo grandi di por haya por lo menos un sentencia di bida largo den prison Mericano, e lo a tuma e decision pa haci un deal cu autoridadnan Mericano.

Na Merca ta existi e posibilidad pa haci deal cu Ministerio Publico Mericano pa loke ta trata sentencia si e acusado bay di acuerdo pa admiti culpabilidad prome cu e caso final ser trata den corte di husticia.

Segun informacion haya for di Merca, señor Habibe a yega na un acuerdo (Plea Bargain), riba "Racketeering Conspiracy" pa cu labamento di 11 milyon Dollar Mericano procedente di ganashi di narco trafico, cu autoridadnan Mericano pa acepta 11 aña di castigo.

Merca tabata acusa Randy cu e lo a uza su negoshinan na Aruba pa laba placa di cartelnan y cu e fondonan laba tabata procedente di narco trafico di 85 tonelada di cocaína y 125 tonelada di marihuana.

Autoridadnan Mericano tabata acusa Randy Habibe di



a laba miyones di dollar pa cartelnan Colombiano y cu e tabata e hefe financiero di cartel Colombiano yama Cartel de la Costa y cu e tabata traha tambe cu cartelnan di Medellin y Cali.

Ambos partido den e caso aki, esta abogadoan defensor di Randy y fiscalnan lo presenta e acuerdo durante e caso cu lo tuma lugar riba 27

di April e aña aki y Randy Habibe lo ser permiti pa bin sinta su castigo na Aruba.

Mirando cu Randy a sinta algun aña caba, lo keda 8 aña mas pa e sinta na Aruba, pero no ta conoci con na Aruba e caso lo ser trata den corte di nobo pasobra nos leynan keto bay ta exige pa un persona bay sera den prison, e mester presenta den corte na Aruba pa



aki hues dicidi cuanto aña e ta haya, pa dje forma ey e por bay legalmente sera den prison na Aruba.

Mayoria biaha e sentencia lo worde adapta na nos leynan y nos sistema, pero segun acuerdonan internacional di ley, no por ta asina cu na Aruba hues por cambia drasticamente e sentencia di 11 aña pasobra mester keda un balans den ambos sistema hudicial.

No ta conoci ainda si des-

pues di e 'Hearing' (caso) riba 27 di April, cuanto siman o luna mas Randy lo keda sera na Merca prome cu e ser manda pa Aruba, pero posiblemente e no lo keda mucho tempo mas na Merca.

Riba fotonan di file por mira Randy Habibe despues cu e caso di su extradicion a ser trata den corte na Aruba y cu e decision a cay cu a por a worde extradita pa Merca.

AZV NO TA SEGURA LENGAA!!

